



XALQ DEPUTATLARI ZARAFSHON SHAHAR KENGASHINING Q A R O R I

2025-yil 16-dekabr

VII-18-201-5-78-K/25

Zarafshon shahar

O‘zbekiston Respublikasi Prezidentining “Qonunchilik hujjatlari ijrosini samarali tashkil etishda davlat boshqaruvi organlari va mahalliy ijro etuvchi hokimiyat organlari rahbarlarining shaxsiy javobgarligini kuchaytirishga doir qo‘shimcha chora-tadbirlar to‘g‘risida” 2021-yil 10-fevraldagi PF–6166-son va “Davlat organlari va tashkilotlarda ijro intizomini yanada mustahkamlashning qo‘shimcha chora-tadbirlari to‘g‘risida” 2025-yil 25-iyuldagi PF–117-son Farmonlari ijrosi yuzasidan 2025-yilning yanvar-dekabr oylarida olib borilgan ishlar to‘g‘risida

O‘zbekiston Respublikasi Prezidentining “Qonunchilik hujjatlari ijrosini samarali tashkil etishda davlat boshqaruvi organlari va mahalliy ijro etuvchi hokimiyat organlari rahbarlarining shaxsiy javobgarligini kuchaytirishga doir qo‘shimcha chora-tadbirlar to‘g‘risida” 2021-yil 10-fevraldagi PF–6166-son (bundan keyin matnda – PF–6166-son Farmon) va “Davlat organlari va tashkilotlarda ijro intizomini yanada mustahkamlashning qo‘shimcha chora-tadbirlari to‘g‘risida” 2025-yil 25-iyuldagi PF–117-son Farmon (bundan keyin matnda – PF–117-son Farmon)lari ijro intizomini mustahkamlashda asosiy tayanch hujjat sifatida xizmat qilmoqda.

Mazkur Farmonlar davlat boshqaruvi tizimida intizom va mas’uliyatni kuchaytirish, qonunchilik hujjatlarining ijrosini o‘z vaqtida va sifatli ta’minlashga qaratilgan. Jumladan, ularning asosiy maqsadi:

davlat organlari va mahalliy hokimiyat rahbarlarining shaxsiy javobgarligini oshirish;

qabul qilingan qonun, farmon va qarorlarning to‘liq va o‘z vaqtida bajarilishini kafolatlash;

ijro intizomini buzgan mansabdor shaxslarga nisbatan qat’iy javobgarlik choralarini qo‘llash;

davlat xizmatida oshkoralik, samaradorlik va natijadorlik tamoyillarini mustahkamlashdan iboratdir.

Shuningdek, PF–6166 va PF–117-son Farmonlari ijro intizomini ta'minlash jarayonida:

nazorat va monitoring tizimlarini takomillashtirish, ijro intizomi holatini muntazam ravishda o'rganib borish;

rahbar va ijrochi xodimlarning faoliyatini natija ko'rsatkichlari asosida baholash va rag'batlantirish;

davlat boshqaruvi va ijro organlarida raqamli nazorat mexanizmlarini keng joriy etish;

ijro intizomiga oid ma'lumotlarni ochiq-oshkora e'lon qilish orqali jamoatchilik nazoratini kuchaytirish kabi chora-tadbirlarni nazarda tutadi.

Natijada, qonunchilik hujjatlarining hayotga tatbiq etilishi samaradorligi oshadi, byurokratik to'siqlar kamayadi, ijro intizomi buzilishining oldi olinadi. Bu esa, o'z navbatida, xalqchil davlat boshqaruvini shakllantirish va fuqarolarning davlatga bo'lgan ishonchini mustahkamlashga xizmat qiladi.

Shu o'rinda ta'kidlash joizki, mazkur Farmonlarda belgilangan vazifalar ijrosini samarali tashkil etish maqsadida edo.ijro.uz elektron hujjat aylanish moduli amaliyotda muhim vosita sifatida xizmat qilmoqda. 2025-yilning yanvar–dekabr oylarida shahar hokimligiga mazkur tizim orqali jami 6 ming 400 ta hujjat kirim qilingani ham ijro intizomining ochiqligi va nazorat mexanizmlarining raqamlashtirilganligini yaqqol ko'rsatmoqda.

Hisobot davrida kelib tushgan hujjatlar tarkibida:

72 tasi – O'zbekiston Respublikasi qonunlari;

103 tasi – Oliy Majlis Senatining qaror va topshiriqlari;

25 tasi – Oliy Majlis Qonunchilik palatasi qarorlari va topshiriqlari;

87 tasi – Prezident farmonlari;

122 tasi – Prezident qarorlari;

4 tasi – Prezident farmoyishi;

81 tasi – Prezident maslahatchilari topshiriqlari;

145 tasi – Vazirlar Mahkamasi qaror va farmoyishlari;

82 tasi – Vazirlar Mahkamasi majlis va rayosat yig'ilishi bayonnomalari;

714 tasi – Bosh vazir va uning o'rinbosarlari topshiriqlari;

116 tasi – Xalq deputatlari Navoiy viloyati Kengashi sessiyasi qaror va topshiriqlari;

8 tasi – Navoiy viloyati hokimining farmoyishlari;

82 tasi – Navoiy viloyati hokimining qarorlari;

838 tasi – viloyat hokimi va uning o'rinbosarlari topshiriqlari;

2 890 tasi – respublika va viloyat tashkilotlari topshiriqlari;

36 tasi – shahar prokuraturasi hujjatlari;

995 tasi – telefonogrammalar hamda shahar hududidagi tashkilotlardan kelgan xatlarni tashkil etdi.

Umumiy 6 400 ta hujjatdan 5 243 tasi ijroga qaratilib, shundan 2 940 tasi to'liq bajarildi, 2 303 ta hujjatning ijro muddati davom etmoqda. Shuningdek, 216 ta hujjatning ijrosi belgilangan muddatdan keyin yakunlangan bo'lsa-da, ularning barchasi to'liq bajarildi. Jumladan, ijro jarayonlarining kechikishi asosan

ayrim mas'ul rahbarlar va xodimlar hissasiga to'g'ri kelgan: A. Shoxmirzayev (79 ta), X. Oripov (52 ta), S. Uvaytov (34 ta), S. Ebotov (20 ta), L. Tursunova (4 ta), M. Karimov (6 ta), Sh. Sirojov (6 ta), Q. Xidirov (1 ta), O. Xotamova (3 ta), S. Safarov (3 ta), E. Ikromov (1 ta), N. Umarov (2 ta), Sh. Ne'matov (1 ta), Sh. Ikromov (1 ta), G. Ro'ziyeva (2 ta) va J. Yorqulov (1 ta).

Mazkur ko'rsatkichlar ijro intizomini mustahkamlash borasida erishilayotgan yutuqlarni ko'rsatib, jarayonlarni yanada samarali tashkil etish imkonini bermoqda.

Shu maqsadda shahar hokimi huzurida 184 marotaba, hokim o'rinbosarlari huzurida esa 748 marotaba muhokamalar o'tkazilib, bayonnomalar asosida mas'ullarga aniq topshiriqlar berildi. Bundan tashqari, 108 ta dastur tasdiqlanib, amaliy ijroga qaratildi hamda yuqori tashkilotlar bilan hamkorlikni kuchaytirish maqsadida 2 711 ta aloqa xati yuborildi.

Shuningdek, O'zbekiston Respublikasi Prezidentining farmonlari, qarorlari, farmoyishlari va topshiriqlarining ijrosini bandma-band ta'minlash maqsadida 1 144 ta banddan iborat nazorat-reja ishlab chiqildi.

Bundan tashqari, har hafta juma kuni kelgusi haftada va har oyning 25-sanasiga qadar kelgusi oyda bajarilishi lozim bo'lgan topshiriqlar to'g'risida birinchi rahbar xabardor qilinib, ijro muddatlari keyingi oyda va kelgusi haftada keladigan topshiriqlar (eslatma xatlari) shahar hokimligi tarkibiy bo'linmalari kesimida shakllantirilib, har hafta juma kuni kelgusi haftada va har oyning 25-sanasida barcha mas'ullarga muntazam yetkazib kelinmoqda.

Shuningdek, shahar hokimligining rasmiy veb-sahifasiga (<https://gov.uz/uz/zarafshon>) ijro intizomi to'g'risidagi tegishli ma'lumotlar joylashtirib, har oyda ma'lumotlarni yangilab borish amaliyoti yo'lga qo'yildi.

Ushbu ma'lumotlar PF-6166 va PF-117-son Farmonlari talablarining hayotga izchil tatbiq etilayotganidan dalolat beradi. Xususan, elektron hujjat aylanishi moduli orqali ijro intizomining to'liq monitoringi, kechikishlarga yo'l qo'ygan mansabdorlarning shaxsiy javobgarligini aniqlash hamda hokimlik faoliyatida shaffoflikni ta'minlashga erishilmoqda.

2025-yil yanvar-dekabr oylarida shahar hokimligi va hududdagi korxonalar, tashkilotlar rahbarlari, shuningdek mas'ul xodimlar tomonidan ish yuritish, ijro intizomiga rioya qilish, yuklatilgan vazifalarni o'z vaqtida va lozim darajada bajarish borasida ayrim kamchiliklarga yo'l qo'yildi. Mazkur holatlarni bartaraf etish, intizomni mustahkamlash hamda mas'ullarning mas'uliyatini oshirish maqsadida shahar hokimligi tomonidan intizomiy jazo choralari qo'llandi.

Xususan:

Shahar hokimining o'rinbosarlari bo'yicha:

hisobot davrida 5 nafar o'rinbosarga jami 12 marotaba intizomiy jazo chorasini qo'llanildi. Shundan 5 holatda o'rtacha oylik ish haqining 30 foizi miqdorida jarima intizomiy jazo chorasini belgilandi, bir nafar hokim o'rinbosari lavozimdan ozod etildi.

Shahar hokimligi boshqaruv apparati bo'yicha:

besh nafar xodimga jami 7 marotaba intizomiy jazo chorasi qo‘llanildi. Shundan bir holatda o‘rtacha oylik ish haqining 30 foizi miqdorida jarima intizomiy jazo chorasi belgilandi, bir nafari lavozimdan ozod etildi.

Mahallalardagi hokim yordamchilari bo‘yicha:

ikki nafar hokim yordamchisi vazifasidan ozod etildi, to‘rt nafariga jami 6 marotaba intizomiy jazo chorasi qo‘llanildi. Shundan bir holatda o‘rtacha oylik ish haqining 30 foizi miqdorida jarima intizomiy jazo chorasi belgilandi.

hududdagi tashkilot rahbarlari bo‘yicha:

Shahar hokimligi ish beruvchi tashkilot sifatida uch nafar tashkilot rahbariga nisbatan jami 4 marotaba “hayfsan” intizomiy jazo chorasi qo‘llilgan bo‘lsa, bir nafari lavozimdan ozod etildi.

Bundan tashqari, shahar hududidagi boshqa korxon va tashkilot rahbarlariga intizomiy jazo chorasi qo‘llash maqsadida ularning yuqori turuvchi tashkilotlariga 15 tadan ortiq turli darajadagi taqdimnomalar kiritildi.

Xulosa sifatida aytish mumkinki, intizomiy jazo choralarning qo‘llanishi shahar hokimligi tizimida ijro intizomini mustahkamlash, mas’ullar faoliyatini samarali tashkil etish hamda ularda shaxsiy mas’uliyat hissini oshirishga xizmat qilmoqda.

Shuningdek, O‘zbekiston Respublikasi Prezidentining 2021-yil 10-fevraldagi PF–6166-son, 2025-yil 25-iyuldagi PF–117-son Farmonlari hamda 2021-yil 31-maydagi PQ–5132-son qarorida belgilangan vazifalar ijrosini ta’minlash borasida amalga oshirilayotgan ishlar muntazam ravishda shahar, viloyat va respublikadagi ommaviy axborot vositalarida yoritib kelinmoqda. Jumladan, O‘zbekiston Respublikasi Vazirlar Mahkamasi muassisligidagi “Yangi O‘zbekiston” gazetasida 2024-yilda hamda 2025-yilning o‘tgan davrida jami 2 marotaba maqola chop etilib, unda Davlat rahbari boshchiligida respublikada olib borilayotgan islohotlar Zarafshon shahri misolida keng jamoatchilikka yetkazildi.

O‘zbekiston Respublikasi Prezidentining 2021-yil 10-fevraldagi PF–6166-son, 2025-yil 25-iyuldagi PF–117-son Farmonlari hamda 2021-yil 31-maydagi PQ–5132-son qarori ijrosini samarali tashkil etish maqsadida har haftaning juma kuni shahar hokimining birinchi o‘rinbosari huzurida, dushanba kuni shahar hokimligi apparat yig‘ilishlarida ijro intizomining ahvoli va “edo.ijro.uz” elektron tizimidagi topshiriqlarning ijrosi yuzasidan tanqidiy muhokamalar o‘tkazilib kelinmoqda.

Yuqoridagilarni inobatga olib, “Mahalliy davlat hokimiyati to‘g‘risida”gi O‘zbekiston Respublikasi Qonunining 6- va 24-moddalariga asosan xalq deputatlari shahar Kengashi

QAROR QILADI:

1. Shahar hokimi N. Rahmanovning shahar hokimligida 2025-yilning yanvar-dekabr oyida ijro intizomi yuzasidan amalga oshirilgan ishlar hamda “edo.ijro.uz” elektron hujjat aylanish modulidagi Prezident hujjatlari ijrosi bo‘yicha axboroti ma’lumot uchun qabul qilinsin va ijroga yo‘naltirilsin.

2. Muddati kechiktirilib bajarilgan 216 ta hujjat bo'yicha mas'ul shaxslarning javobgarligini oshirish, takroran bunday holatlarga yo'l qo'ymaslik maqsadida shahar hokimligi va tegishli tashkilotlar tomonidan chora-tadbirlar rejasi ishlab chiqilsin va amalga oshirilsin.

3. Shahar hokimligi (A. Shoxmirzayev, X. Oripov, S. Ebotov, S. Uvaytov, L. Tursunova), tegishli korxonalar va tashkilotlar rahbarlari:

“edo.ijro.uz” elektron tizimida ro'yxatdan o'tgan barcha topshiriq va vazifalarning o'z vaqtida, sifatli hamda to'liq bajarilishini ta'minlash;

ijro intizomi buzilishining oldini olish maqsadida ichki nazoratni kuchaytirish, intizom buzilishiga yo'l qo'ygan mas'ul xodimlarga nisbatan qonunchilikda belgilangan tartibda javobgarlik choralarini qo'llash;

har haftaning juma kuni shahar hokimining birinchi o'rinbosari huzurida, dushanba kuni esa shahar hokimi rahbarligida tashkil etiladigan apparat yig'ilishlarida ijro intizomi holati va elektron tizimdagi topshiriqlar ijrosi yuzasidan tanqidiy muhokamalarni muntazam o'tkazib borish;

mas'ul xodimlar uchun ijro intizomi va elektron tizimdan foydalanish bo'yicha seminar va o'quv mashg'ulotlarini muntazam tashkil etish;

har chorakda ijro intizomi bo'yicha tahliliy hisobot tayyorlab, uni xalq deputatlari shahar Kengashiga taqdim etish;

kechiktirilgan yoki lozim darajada bajarilmagan topshiriqlarni tahlil qilib, sabab va omillarni aniqlash, ularni bartaraf etish bo'yicha manzilli chora-tadbirlar ishlab chiqish, tegishli mas'ullarga ogohlantirishsiz qat'iy javobgarlik belgilash hamda shahar hokimiga axborot taqdim etishga qat'iy amal qilsinlar.

4. Shahar hokimligi ijro intizomi nazorati bo'yicha bosh mutaxassisi Sh. Ne'matov har oyning yakuni bilan elektron tizimdagi topshiriqlar ijrosi to'g'risida batafsil tahliliy axborotni tayyorlab, shahar hokimi va hokim o'rinbosarlariga taqdim etib borsin.

5. Xalq deputatlari shahar Kengashi kotibiyati (E. Davlatov) tegishli mas'ullar bilan birgalikda O'zbekiston Respublikasi Prezidenti va Vazirlar Mahkamasi tomonidan tasdiqlangan hujjatlarning ijrosini samarali tashkil etish yuzasidan jamoatchilik nazoratini o'rnatish.

6. Shahar hokimligi axborot xizmati rahbari – matbuot kotibi (J. Yorqulov) hamda “Oltin vodi” gazetasi (G. Bobomurodova)ga:

O'zbekiston Respublikasi Prezidentining 2021-yil 10-fevraldagi PF–6166-son, 2025-yil 25-iyuldagi PF–117-son Farmonlari va 2021-yil 31-maydagi PQ–5132-son Qarorida belgilangan vazifalar ijrosi yuzasidan amalga oshirilayotgan ishlarni keng yoritish;

mazkur yo'nalishda erishilgan natijalarni jamoatchilikka yetkazish maqsadida O'zbekiston Respublikasi Vazirlar Mahkamasi muassisligidagi “Yangi O'zbekiston” gazetasida maqola chop etilishini ta'minlash vazifasi yuklatilsin.

7. Mazkur qarorning ijrosini nazorat qilish shahar hokimining barcha o'rinbosarlari va xalq deputatlari shahar Kengashining doimiy komissiyalari zimmasiga yuklansin.

Kengash raisi



**RAXMANOV
NAZIRBEK
ISRAILOVICH**